



UNIVERSITÄTS-
BIBLIOTHEK
PADERBORN

Germania Superior.

[urn:nbn:de:hbz:466:1-67086](#)

G E R M A N I A
S V P E R I O R.



LVNTVR IN GERMANIA
Superiore socij duceti quinqua-
ginta sex. Ingolstadij sexaginta:
Landspergæ triginta octo : tri-
ginta Dilingæ : vno minus Mo-
nachij : Augustæ vigintiquin-
que : Oeniponti septemdecim: sedecim Lucer-
næ: Halæ, & Friburgi quaternideni: Ratisbonæ
tredecim. Vitam finiere quinque: Inicere Socie-
tatem vnuis & viginti.

C O L L E G I U M I N G O L-
stadiense.

PRAETER STATAS conciones, quas
duobus in locis nostri habent, in vicinis
etiam Parœcijs aliquoties idē præstitum cum
fructu: excepta confessionum amplius septem
millia: in ijs generales plurimæ, vel certe mul-
torum annorum. ad Ecclesiam reuertere virgin-
ti quinque: in his vhus Caluini olim affecla, &
multorum corruptor, dein Lutheri æmula-
tor opinionum: qui cum in neutra secta securi-
tatem reperisset, errabundus Ingolstadium ve-
nit, vbi proborum hominum liberalitate su-
stentatus, deque fide Catholica diligenter a, no
stris

stris edoctus , inuenit animi tranquillitatem: adolescentulus quindecim annorum cum frequenter audisset nostris in scholis , ad quas itabat, de peruersitate dogmatum Lutheri , tanto amore Catholicæ religionis exarsit , vt oblatis præceptoris hæreticis libris , quos legerat parentis iusu , apud animum suum constitutum habuerit amplecti Catholicam fidem: quod cū pater eius audisset, repete aduolat Ingolstadiū, vnde, precibus, pollicitationibus, minis futuræ etiam exhereditationis, quin, & adhortationibus, sermonibusque Prædicantium , nihil mouens, discedit re infecta: sic tamen, vt ante filiū multis cum lacrimis nostrorum fidei committat. Tres remedio confessionis dæmonem abse abegerunt, nocturnis diurnisque spectris terrores varios afferentem . Alius anxiferis scrupulorum aculeis ita male accipiebatur , vt neque Crucis signū formare, neque exequi preces recitando posset, quin multa aduersa reuertēs ad easdem voces subinde reuolueretur , non tam debilitate, lapsuve linguæ, quam æstu mentis: ex hac misera solitudine quomodo se expediret , ab uno e nostris sacerdotibus consilium expetijt, Deoque adiuuante factum est, vt vna eius congressione , auertentis noxam ab inuito , ac docentis, vnde voluntas absit , culpam abesse , non modo timore omni, sed etiam cura liberaretur. Viri duo, e quibus alter monachus , in grauissimo morbo cum deficere ani-

M

mam

mam sentirent, (tunc enim præcipius votorum locus est cum spei nullus est) Dei genitrice suppliciter inuocata, conualuerunt. Quidam summo loco natus cum Bacchanaliorum diebus magnam pecuniam ludendo comparasset, eam omnem de nostrorum consilio in pauperum usus erogauit. Data est in scena illis ipsis diebus Pœnulus Plautina; qua hilare conclusa, accessit appendix, quæ plus haberet utilitatis. Processit adolescens cum muliebri schemate referens Pietatem, vultu, amictu, gestu, omnibus ad mestitiam compositis: tum sermone lamentabili, mortui caput, quod hactenus fuerat in media scena, & sublimi loco opertum, digito demonstrans, breui quodam grauique exadio, percurrens omnes hominum gradus, admonebat unam tandem speciem futuram omnium, & quemcumque splendorem rerum humanarum desinere in illam umbrā. augebat religionem, & metum, caput ipsum, terrificum resonante voce, per cauatam ad id arundinem clanculum inspirata, reddens saepius haec verba, Mori necesse est. quo tristi spectaculo ac terrore occupatis animis, actio tota conticuit. Catechismi explicatio, quæ sex diuersis in locis traditur, non solum iuuentuti natuque grandioribus fructuosa accidit, sed in templum etiam capacissimum transferenda fuit, superante multitudine. Cum extrema Quadragesima populus Ingolstadiensis de more varia templo obiret, Catechistica etiam

etiam schola, perpetuo agmine personantibus
vijs musico concentu, sub signis apparuit ma-
gno certamine pietatis. Eodem tempore, in vi-
cinis aliquot pagis, patres nostri non infructuo-
si fuerunt: conciones habitæ: confessiones audi-
tæ ad quadringentas: et vero cum flexissent in
quoddam Bauariæ oppidum, iamque rumor
peruasisset fore, ut ad confessionem omnes adi-
gerentur, nostri, ut occurrerent famæ ita aduer-
ſæ, cum Parocho egerunt, conuocato coram po-
pulo refutaret, quæ nullo auctore certo iacta-
bantur: neminem cogendum: confitendi, non
confitendi liberam omnibus potestate fore:
neque vltra vnum aut alterum diem calidum
mendacium valuit. igitur illic etiam conciona-
ti: & audierunt non paucos sponte confitentes.
doctrina Christiana magno cōcursu hominum
tradi cœpta: compositæ inimicitiæ: odia restin-
cta. Ceterum cum propter flagrantem horam
Caniculæ grauiora studia proferrentur, nostro
rum industria in varijs religiosorum cœnobijs
utiliter versata est: eoque nomine sibi, & Socie-
tati vniuersæ monachorum animos deuinxe-
runt: ex eo effectum, vt e varijs Bauariæ mona-
sterijs, in Collegio cōuictorum, pæne quinqua-
ginta numerentur. De re litteraria illud scri-
bere habeo, eam, & numero auditorum, & dili-
gentia numquam feliciorem fuisse. In Acade-
mia crebro de rebus Theologicis, & Philoso-
phicis disputatum, quibus exercitationibus

M 2 frequen-

frequētes interfuerū iuniores serenissimi Prin-
cipes , & præclarum eruditionis specimen in-
terdum dedere: quinque Theologica laurea do-
nati:e quibus tres Pontificij alumni:libri varij,
& ad rē Catholicam iuuandam appositi nostro-
rum opera prodiere : e quibus non pauci ad di-
uersa loca transmissi,magno,vt speramus,mul-
torum emolumento : offuciæ hæreticorum cre-
puerunt in igne.Duo desiderabantur ad melio-
rem Collegij statum , quo pluribus posset pro-
desse : paulo ampliores reditus , & capacius sa-
cellum : vtrique incommodo remedium pro
tempore allatum est . Monasterium quoddam
ad nostras rationes accessit , & templum
biennio ante inceptum,consecratum hoc anno
quarto calendas Nouembris . Sed de vtroque
seorsum nonnulla dicenda . igitur ex occasio-
ne Monasterij excusum est in loca subiecta , &
prævia exomologesi conuenere ad synaxim
centum sexaginta: superstitiones etiam multæ
sublatæ: hæreticus quidam,qui complures iam
annos pro Catholico se gerebat, amissa simu-
latione se cum Ecclesia reconciliavit . Iam, vt
adijciamus de absolutione templi , & de eius
initijs aliquid dicendum . Nemo auctor ipsius
ædificandi fuit, nemo pollicitus est impensam:
debile ipsius principium , mediocres progres-
sus, celer exitus & facilis: ab sancta Cruce ap-
pellationem habet . Porro die consecrationis
varia carminum genera , & ænigmata diei lo-
coque

coque congruentia parietibus affixa , eleganti pictura . Pransi in Collegio serenissimi Principes iuniores , e quibus Ferdinandus sub vesperras ad frequentissimum populum orationem habuit Latinam , singulari omnium approbatione : & ne quid deesset ad illius diei celebritatem , in area Collegij conuictorum data est tragedia Iezabel , admirabili aplausu spectatoru .

M I S S I O B R V N O V I E N S I S .

B R V N O V I E N S I S oppidum est inferioris Bauariae : huc misi fere dotes duo sub initium Quadragestæ : & quamquam principio non nihil commoueri videbantur , an iactis vocibus malenolorum , oppidani suspicaces , paulatim tamen deleniti sunt nostroru consuetudine : & suspicio abscessit . Quarta vñus , & sexta quaque feria , diebus item festis , concionabatur ad populum : doctrinam Christianam alter exponebat , ita assentiëtibus hominibus ; & a currentibus , ut e quadam æde satis ampla migrari in aliam capaciorem fuerit necesse : fructus par utriusque labori . inuterati abusus sublati , accersitis institutis melioribus : quale fuit illud recitandi Rosarium Mariæ Virginis : iam enim præclara ea confitudo ita exoleuerat , ut si conspiceretur aliquis cum Rosario , irrisui esset . aures datae confitentibus quadringentis quinquaginta famosa mu-

lier a turpi vita ratione ad honestatem addueta. Iudicis magistri ad iuuentutem tum litteris, tum bonis moribus rectius informandam edocet. nosodochia visitata, non absque miserorum solatio fructuque: illud vnum plerique mirabantur, quod nostri non minus familiariter cum tenuibus, & egentibus, quam cum honoratis, & opulentis hominibus versari consuefent. Ceterum quam grata ciuibus & accepta fuerint nostrorum obsequia, cum alias non semel, tum maxime in eorum abitu demonstratum est: nam Senatorius ordo non magnifico solum epulo, nomine totius ciuitatis, illos exceptit, sed & liberale viaticum se curaturum affirmauit. recusarunt ipsi, cum hoc dicto, sati se ab illis habere, si intelligerent labores suos eorum ciuitati non iniucundos, nec inutiles fuisse.

COLLEGIVM DILINGANVM.

MEDITATIONIBVS Societatis, praeter monachos quinque, Parochus unus, & tres adolescentes, cum fructu exculti: in Societatem recepti nouem. Sodalitas Deipara virginis tripartita est: conflatur scilicet e maioribus, minoribus, monachis: triplex genus hominum, triplex appellatio: maximus omnium in pietate, & litteris profectus. Post acceptas ab urbe leges, exactior disciplina.

Quidam

Quidam a prava flagitiorum consuetudine ab-
reptus nocturna imagine hominis stricto ense
cædem minantis . Monachi ferme sexaginta . e
nostra enim educatione extitere Abbates peru
tiles cœnobijs suis; e quibus subinde alios mit
tunt ad eundem ludum . ad Collegium conui
ctorum etiam summi Pontificis Seminarium
pertinet, quod ex Theologiæ dumtaxat , vel ex
Philosophiæ , auditoribus constat : aliquot in
messem Domini hoc anno emisi , varijs in lo
cis apud Principes viros & frequentes populos
fructuose agunt : vt appareat non ad speciem
solum, quod missant nonnulli, sed multo magis
ad usum Seminaria publica instituta . Illud ve
ro de discipulis vniuerse dici potest , esse non
de sua tātum, sed & de suorum salute solicitos :
ita , si quem e nostris per eorum patriam tran
fere contigerit , dant litteras domum , ne tam
exoptatam de peccatis confitendi occasionem
præterire patientur . In litteris etiam pro
gressus non exigui : quod , & testanrur multi
promoti ad Academicos gradus , & publicæ
disputationes . Cum in vicino oppido Luthera
na schola assertiones nonnullas aduersus bona
opera euulgasset , quidam eius loci auditor ad
nostrum hominem sibi cognitum exemplar
misit , adsignificans permultis gratum fore ,
si de nostris quispiam eo disputatum se confer
ret : iuerunt duo , Theologis aliquot auditori
bus comitati: ad eorū ingressum aspectumque ,

ut poterit ex improviso, admurmurante toto confessu, magna omnes admiratio, & expectatio cepit: cum a Præside, superbia an formidine, non invitarentur, ipsi tandem modeste se offerunt, & invitatos dudum sese profitentes pagina transmissa, petunt disputandi locum. Heu imperitia: ut saepe in descendis aduersarijs audax es, ubi absunt: cum aduenere, in detecta dismeticulosa. quid agat forex suo indicio deprehensus, & desperato effugio? fluctuatur, habitat, vultu, colore, ac motu corporis pariter, atque animo varius, negat a se quemquam invitatum, esse alios audiendos, non superesse spatum: denique terit tempus: ægre tamen, pro sua modestia, nostri, ut argumentarentur extorsere. Inter disputandum, mirum dictu quam multa aliena, absonta, absurdæ, nebulo effutierit: quam non solum Catholicis, sed etiam sibi pugnantia, difficile est enim contra veritatem stare pro mendacio: denique eo descendit, ut negaret Fidem necessariam esse ad salutem. actum tamen in tota disceptatione, modeste, sine iurgijs, & clamoribus. mirum fuit oppidanis, cum vide runt suos Prædicantes, qui in suggestu tam malignifice de se, & contemptim de Catholicis loquebantur, ut vel spiritu difflaturos gloriarentur omnem machinam illorum, repente viso uno utque altero Iesuita, ita corruisse, ut haud secus quam icti pestifero sidere pauerent. Extra Academiam cuiuslibet etiam opera nostra num-

quam defuit. In templo magnus omnino contentum numerus, & communicantium, non vrbani modo, sed externorum quoque, eā ob causā vel e locis longinquis ad nostros conuenientiū. confessiones de tota vita auditæ plurimæ: ab hæresi soluti vltra viginti: scripta heretica, superstitionis, impudica, exusta. inimicitia sublatæ. cum Parochis quibusdam actum de concubinis ejiciendis, deque recte vita insti tuenda: multi qui a dæmone putabantur obsessi, ad nos missi, consilijs & salutari confessione adiuti. Quidam, qui magica superstitione, ture, cereis incensis, mactatione gallinarum alijsque impietatibus dæmonem venerabatur: alius item, qui cum eodem bis proprio sanguine sanxerat fœdus, ad veram religionem directi. Itum sæpe in leprosorum domum, & valetudinarium, cum aliquo fructu: ad ægrotos etiam in vrbe, e quibus phrenetici duo, cū ad se redissent, paulo ante mortem peractis omnibus quæ decent religionem Christianam, petitæ & impetrata a circumstantibus venia, diem suum obierunt. Catechismi explicatio quæ in Parœcia, superiore anno, nobis commendata est, sua eam auctoritate, & liberalitate Episcopo promouente, felices progressus habet: eius ære, plurimi libri, imagines, Rosaria partim in vrbe, partim in pagis cum fructu distributa. Iudi moderator Germanicus, quo promptius suis cum pueris Catechismum fre-
quen-

quætaret, ab eodem donatus: eiusdem iussu, Catechismi tempore, Prætor vrbanus, plateas, & compita lustrare folet, vt ne quis sit interea qui lasciuia deditus aut inertia, illam horam præterfluere sinat. Hæc domi acta. foris etiam non nihil. In pagis vicinis frequentior sacrorum usus introductus: multi in fide firmati: cuidam persuasum, vt deponeret Iudaicas superstitiones. Ginsburgū, vt alijs etiam annis, itum diebus ieunij maioris, ibique habendis sermonibus ad populum, audiendis confessiōnibus amplius sexcentis, rudibus instituendis, ægrotis inuisendis, utiliter laboratum. eodem tempore Veringam prium euocati: trecen-
taque illic confessiones plus minus exceptæ: aliaque nonnulla ex illius populi salute gesta sunt. Vicinis nobilibus, a quibus accersebamur, consilio æque, & obsequio præsto fuimus. Ferijs æstiuis sacerdotes duo Almangauiam ab Episcopo cum litteris, & viatico missi, eam præcipue operam dederunt, vt Catechismi docendi traderent rationem in Parœcijs, scholisque, & alijs locis: publicis deinde priuatisque sermonibus multa effecerunt: simultates sopitæ: mores emendati: vitia extirpata: renouatus cultus antiquæ religionis. Quodam loco accidit, vt cum multi confessione expiatæ se compararent ad Eucharistiam postridie sumendum, mulier de repente corriperetur pedum doloribus peracerbis: sic ut non nisi scipionis,
& alio-

& aliorū adminiculo duceretur, potius quam
graderetur ad templum. mirabile dictu, sum-
pta Eucharistia, cuius incredibili desiderio te-
nebatur, liberata omni molestia inter medios
gratantes domum abijt exultans. sub idem
tempus, alijs sacerdotes duo, in varijs Sueviæ
monasterijs non sine fructu hæserunt: ac ne to-
ties contrita persequamur, cum ad cœnobium
virginum ipsius rogatu Antistitis exhortatio
habetur, tale apertū est ostium rei bene geren-
dæ, vt sub Calendas Nouembres accerferetur
sacerdos ad omnium confessiones: erat in ijs
vna, nescias naturæ vitio, an dæmonis instin-
ctu, alijs molesta, quibus, & sæpe intentauerat
cædem: eadem Patris nostri sermonibus ita
demitigata est, vt ceteræ mirentur. Apud cœ-
nobium etiam, quo tantum patet aditus virgi-
nibus illustri familia (Canonissas appellant)
eadem præstata munera Societatis. Sacerdos
alius e nostris, in thermis cum ageret, frequen-
ti Missæ sacrificio, & hebdomadaria quorum-
dam confessione communioneque, eius loci
incolas ad pietatem accendit. Inde, per uigila-
tiones hibernæ, quibus iuuenes inter puellas-
que, saltationes, cantiones, compotationes, e-
xercebantur, semina malorum, exactæ. Puella
quædam eius loci decumbebat destituta omni
fere sensu, hortatur sacerdos eos, quorum in-
tererat, vt ad opem diuinam confugiant, po-
stridieque sacro intersint: paruerūt illi, & puel-
la me-

la melius habere cœpit. deinde omnino conua-
luit. Eluangam hoc etiam anno s̄epius itum.
Quadragesimam totam duo ibidem sacerdo-
tes per quam vtiliter occupati fuere. Catechis-
mi schola, quam Principis munera vehemen-
ter ornarunt, numquam frequentior. absterse-
runt sordes conscientiæ centum homines su-
pra mille: liberati ab hæresi non pauci. Deni-
que Eluacensis populus, Dei beneficio, quotan-
nis fit melior, & doctior. Est oppidum Eluan-
gæ proximum Reuerendissimo Præposito su-
biectum, situm in finibus hæreticorum, ipsum
que propter negligentiam Parochorum infe-
ctum hæresi magnam partem. Missus eo aliis
sacerdos, per partem veris ieunio sacratam,
& posuit operam, in ea gente adiuuanda, non
solum utilem, sed necessariam. hæreticorum
libri inflammati: rudes in fide instructi: ne op-
pidanorum filij apud vicinos hæreticos edu-
cetur, publice cautum: religionem Catholicam
respexere ducenti. His alijsque officijs illum
populum ita demeritus est pater, vt abeunte
comploratione prosequerentur. Ceterum his
nostrorum laboribus, admirabilis Dei beni-
gnitas, & piorum hominum, virorumque nobis-
lium, maxime ipsius Principis, spectata s̄epius
liberalitas egregie respondit.

COL-

COLLEGIVM MONACHIENSE.

AD T E R N A S conciones accessit Italica
rogatu serenissimi Ducis. Doctrinæ Chri-
stianæ, quæ traditur in templis quinque, nihilo
fere minor, quam concionum fructus: sed cum
ob veteris aulæ sacellum Italo concionatori
concessum, deesset vni Catechistæ locus, se-
renissimus Princeps Ferdinandus rogatus de
suo, quod habet apparatissimum, non solum li-
benter dedit, sed multa etiam addidit munu-
scula, quibus puerorum ætas allici solet: homi-
nes vicies mille noxis soluti: hæresi tres & qua-
draginta: obscenorum auctorum, & damnato-
rum libri combusti: mulieres sex ab impurita-
te vitæ ad honestatem traductæ: odiorum ra-
dices, quæ partim tacite, partim aperte serpe-
bant, cum fibris euulsæ. Quidam luculentæ pla-
gæ, quam in facie acceperat, iniuriam condo-
nauit: alij præstigijs dæmonum liberati: a me-
ditatis sceleribus, ac præcipue a conscienda
sibi morte nonnulli deterriti: fuerunt & qui-
dam, qui diuinitus se admonitos fuisse dixerūt,
vt susceptis longi itineris difficultatibus apud
nos peragerent confessionem. ad ægrotos, &
animam agentes aditum frequéter, magnoque
cum fructu. ad mortem propter maleficia dam-
natis allatum solarium, & subsidium. Quo ex
numero, mulier æta ad supplicium, cum forte
obuium

obuium habuisset auctorem comprehensionis suæ, commasculans frontem, Tibi vero, inquit, libenter ignosco, ago etiam grates: plus enim mihi inimicus profuisti odio, quam amici omnes profuissent obsequio. Ad subiectos interdum pagos excurritur, & dum adulti confessione expiantur, erudiūtur pueri doctrina. Magna autem pietas Monachiensium: declarant eam cum cetero anno, tum vltimis præcipue diebus sanctioris hebdomadæ, venerantes in templo nostro instructissimum Domini sepulcrum: nec vinci se patitur Dux cum coniuge serenissima: quo tempore vidisses (nec tempe rasses a lacrimis) pueros Angelorum ornatū, certa de Domini cruciatibus capita, distincte, & explicate prælegentes: nam quid dicam de crebris quorumdam verberationibus? per integrum horam vnum grandior natu, vel prohibetibus alijs, sese cecidit: minoribus cum præfinitum esset spatium non ita longum, breuitatem temporis verberum grauitate pensarunt: votiuis peregrinationibus anniuersarijs adiuncti aliquot e nostris vtilem operā posuere. Domini Præpositi vocatu duo Oetingā missi, cum primaria Sodalitate, post Christi ferias resurgentis: post ascendentis enim ad Montem Sanctū iuere quinque: in qua peregrinatione nihil ad exemplum illustrius fuit trium Principum iuniorum præsentia, quos serenissimus parens accersierat: ibant pedites, & pelliti, Rosarijse collo

modus

collo pendentibus, vt habitu a ceteris sodali-
bus nihil different. Mandatu Ducis Christia-
nissimi, pro Ecclesia, & afflictis præsertim Gal-
lia rebus, tridui suplicatio indicta: vt viri mu-
lieresque irent ad templo diuersa. Sex id tem-
poris habitæ conciones: quattuor a nostris: has
supplicationes consecuta est comprecatio ho-
rarum quadraginta, distributis vicibus in Soda-
litates, & Clerum: spectata præter ceteros reli-
gio adolescentium utriusque Sodalitatis. clau-
sit ordinem cum omnibus suis aulicis Dux ip-
se, qui horis duabus, fixis humi genibus, ita at-
tente oravit, vt ceteri omnes fatigaré tur. Nec
vero tantum suis prælucet subditis pietate, sed
profuit etiam non parū seueritate. Graue pro-
posuit edictum principio anni in eos, qui ver-
bo violarent numen diuinum. iussit id promul-
gari a concionatoribus pro suggestu: dein
tertio quoque mense, ne quis caufetur obliuio-
nem, ipsius memoriam populo renouari. Hinc
multis magister officij supplicij metus. Scho-
las nostras frequens, & delecta iuuentus nobil-
itat. floret etiam, & augetur cōuictorum con-
tuberniū: et si propter locorum angustias com-
plures excluduntur: ad litterarum cognitio-
nem, & studium religionis pari cursu conten-
dunt. Inter omnes primas tenent qui Deipa-
ræ Sodalitio nomen dedere: sunt enim etiam
intenti proximorum saluti: adducunt alios ad
patefacienda peccata, alios ad deponendas in-
iurias.

iurias. sunt qui præcidant multis causam flagitij, nec desunt qui egenorum paupertatem liberalitate solentur. Extremum illud esset, ut diceremus aliquid de eximia voluntate, & munificientia erga nos optimi Principis: sed quoniam nulla eloquès gratiarum actio reperiri potest, quæ adæquet minimam partem illius magnitudinis, in admiratione tacita reponatur.

COLLEGIVM AVGVSTANVM.

CONCIO quæ in templo nostro sub initium Quadragesimæ haberi solebat, multauit in Catechismum. confluunt pueri pueræque, ipsi etiam adulti: sed inter pueros & puellas æmulatio permagna, certamen vero etiam visendum. victores exultant, victi concidunt: sed ita, ut alio die paratiores reuertantur: auget cupiditatem voluptas cantionum, & munuscilorum frequentia: eiecerunt se a prauis opinionibus de religione viginti nouem: non pauci suscepto multorum milliarium itinere ad nos venerunt exonerâdæ conscientiæ: mutans in fide, & defectionem cogitans, ne laberetur erectus. Quædam ab hæreticis inducta, mox pœnitens facti, instructa, & ad illorum laqueos cautior facta. virgines duæ inter hæreticos aliquot annos versatae, numquam adduci potuere, ut eorum cœnam degustarent: alia, ieiunij tempore, carnes per vim ori ingestas contemptis.

temptis minis præmijisque, admirabili constan-
tia eiecit. Quidam inops rei familiaris men-
tisque, cum se in profluentem proiecisset, semi-
animis extractus, utriusque rei remedium, Deo
dante, a nostris accepit. Prætereo adulterina
coniugia, & illegitimos toros separatos, dissidia
inter coniuges composita, libros de rebus tur-
piculis, & periculis in ignem coniectos, du-
bios retentos in fide: aliaque sollemnia. ægro-
ti in nosocomijs, & alijs etiam domicilijs vr-
banis, dies noctesque visitati: apud eosdem ne-
cessitate vrgente excubiæ actæ: adultis caren-
tibus Confirmationis sacramento, & præ pu-
dore abstinentibus persuaserunt nostri, vt ab-
stinere vereantur: quod pudere præstet, quam
pigere, vbi prætermissio necessarij officij est
periculosa. egenis ac tenuibus familijs piorum
hominum liberalitate benigne factum. In pa-
gis duobus suburbanis Catechismi explicatio
numquam intermissa: in eorum altero, absente
Parocho, concionum confessionumque par-
fuit fructus, alio loco, puella, furore, an diabolo
impellente, nullum signum habens sanæ mentis
tranquillitati redditæ. Ac ne plura his similia
confecter, Pater vñus in graui negotio euo-
catus, illustris viri coniugem non solum repe-
rit a viro alienatam, sed prope a mente deser-
tam: ac primum detractis superstitionis nugis
cum inuolucris aureis, quas habebat ad collū,
ac reposito in eorum locum simulacro agni

N cæle-

cælestis, in cera consecrata, bene sperare iussatum deinde confessionem de tota vita vt insti-tueret admonita : nec spes illa, aut confessio frustra fuit: prouoluta ad genua mariti, mæ-rens, & lacrimans, vt in gratiam reciperetur postulauit: magna vis pecuniæ sacerdoti obla-ta reiectaque est: illud depoposcit, testificandæ non ingratæ erga Deum voluntatis, daret ope-ram, vt correctior esset Clericorū disciplina: erudiretur populus præceptis Christianis: ac, si quis irreligiose usurpasset nomen diuinum, graui pœna sanciret: id se facturum pollicitus est regulus, quin etiam chirographo firmauit. Ceterum sacrum instrumentum ita auctum, al-tareque maximum tot muneribus, & operibus exornatum, vt eorum magnificentia, & libera-lem ostendat piorum voluntatem, & excitet mi-rantium religionem : nec defuere aliquorum dona, quibus Scholaisticorum pauperum, qui aliena viuunt misericordia, & Collegij egestas toleraretur . Ad discipulorum pietatem pro-mouendam constituta Sodalitas perpetuæ Vir-ginis, & paucis numero mensibus spem omnem vbertate superauit . Has ob res, quarto ante idus Septembris, post datum a sodalibus scenæ, ac populo, vnum e miraculis Matris sanctissimæ, recitatum est decretum confirmationis in frequenti corona virorum illustrium, tanta ap-probatione omnium, vt e Scholaisticis tantum, delectu habito, nonaginta amplius censeantur.

Actus

Actus etiam dialogus, vt fere quotannis, in renouatione studiorum tanta spectantium voluptate, vt admirabile esset. Progymnasmatū Latinitatis auctore Patre Iacobo Pontano volumina duo (tertium enim adhuc est sub lima) ita grata, & utilia acciderunt, vt a pueris non solum ediscantur passim, & recitentur in disputatione, sed doctorum etiam virorum terantur manibus, & commendentur: id ei rei signum: quod ter vno anno impressum est Ingolstadij volumen primum: hoc quanti sit, facile ex illis intelligitur, qui fuerunt superstites librorum suorum. Fridbergensis domus suburbana, de qua proxime scripsimus, ornatu templi, & horiti cuiusdam accessione, amplior, & illustrior facta.

LANDSPERGENSE COLLEGIVM.

E NOVITIORVM grege, exacto probatōnē biennio, ad varia huius Prouinciæ Collegia septemdecim missi: ceterorum qui exercentur, magna spes, indoles, industria: illudque peculiare studium, vt tales sint, quales eos esse nostrarum legum disciplina, & Superiorēs volunt. mittuntur interim ad pagos, & consuescunt imbuere puerorum mentes, & agrestium: rudimenta illa, & incunabula nostræ Societatis. Peregrinationes ad pia loca, & remota suscepérunt duodeuiginti, haud scias ma-

N 2 iore

iore defatigatione corporum, an animorum exercitatione: nam præter laborem, & incommoda itineris, magna etiam verborum contumelia, & iniurijs, ab hæreticis affecti: quæ tamen omnia, illorum vicem magis dolentes, forti pectore tulerunt. varijs etiam in locis, occasione oblata, afflictis & egentibus fuere magnas solatio. Parocho in primis grauiter ægrotanti, quem Nouitius sacerdos (reluctantibus licet domesticis, & præstigiatorem appellantibus) eo perduxit, ut eiecta concubina, e qua numerosam prolem susceperebat, aperuerit omnia peccata, quæ vel a pueritia meminisset: et si coualuisset, receperit ordinaturum melius vitâ, honesto quodam viro præsente, data dextera, in id quod petebatur, fidei obligandæ. Hæc de Nouitijs, Conclaves tum in nostro templo, & in Parœcia magna, tum etiam in pago ciuitati proximo, frequëtes fuere; auctusque numerus frequentantium sacramenta: verum ne quis in confessione rite atque ordine obeunda, pretendere possit ignorantiam, traditus est publice modus, quo quisque totum diem secum scrutetur, factaque ac dicta omnia noctu remetitur: eam rationem complexi homines circiter ducenti: cum Ecclesia in gratiam restituti hæretici noué: libri damnatae perfidiæ oblati, assumptique flammis. Quidam grauissimis conscientiæ stimulis agitati, deque salute animæ desperates, atque ex eo numero præcipue tres,

libe-

liberati molestissima cura , & ad spem melior-
rem erexit . Mulier, quæ toto fere triennio, quo
sacris abstinuit, ipsa suum cor edens, & vitans
vestigia hominum, errabat misera in campis,
dæmone interim instigante, ut vim vitæ suæ af-
ferret, vel aqua, vel laqueo, nostrorum suasu-
fibi, & hominum cœtui restituta . Alia vehe-
menter vexata a dæmone, & vir quidam, ut ar-
bitrabatur, a Lamijs nocturnis, remedium inue-
nere: ab aqua lustrali illa, hic a consecrata ima-
gine agni . destitit unus a consilio sibi consci-
scendæ mortis : ab incepto alius præbendi al-
teri venenum . vna denique mulier, cum a pue-
ritia deperisset adolescentulum, irrito voto, in
furorem versa, cacodæmoni, qui ei se obtule-
rat in eius specie quam amabat, pecuniam pol-
licens, & alia munera, si Deo Mariæque renun-
tiaret, ut sunt faciles plerumque mulieres, præ-
fertim vbi aurum refulserit, succubuit: eius de-
inde cōsuetudine v̄sa est ad annos quindecim:
cum interea nō abstinenter a flagitijs infandis:
hæc tandem, Dei ductu, cum accessisset ad no-
stros, eiusdem benignitate, rescisso fœdere ab
immani tyrannide liberata est . Prætermitto
hic, ut in transcurſu, impedita diuortia, con-
cubinas amandas, res restitutas, pauperum,
curisque anxiorum necessitatibus consultum,
agrotis vincisque subuentum. hæc & alia, fin-
gillatim prodi possent, si vellem: sed nos cum
delectu modum seruabimus .

COLLEGIVM OENIPONTANVM.

POENITENTIVM multitudo concionum fructum ostendit. Peccata apud nos expiarunt hominū septemmillia trecentiquatuor: hæretici aliquot persanati: meretrices e profundo libidinis, & desperationis extractæ: vir adductus, ut pellicem quam habebat, uxorem duceret, recreatus e graui morbo: nonnullis, quos malignus hostis fur ijs agitabat, inditæ precibus, & particula cōsecratæ ceræ, auxiliū allatum. Idem remedium cuidam adhibi-
tum, qui, cum ex futurarum rerum prædictione existimationem sibi conciliare vellet, ad dæmonem adhæserat: hunc cum morbus adfixis-
set lecto, sine spe valerudinis recuperandæ, at-
que, ut indicabat ipse, voce, nutu, motuque cor-
poris, desperata animæ salute, audiuit tamen
vnuis e nostris, nec multo post Deus sanitati re-
stituit: & agnouit ille beneficium, animæ, ma-
gis, quam corporis incolumnitate lœtatus. Fu-
riæ nescio quæ sic puerum inuaserant, ut deser-
tos per locos, filuasque deerraret lymphatico
discursu: is cum vi adductus ad nostros esset,
animaduersum est habere schedulas, in quibus
notæ non intellectæ, & monstrosa nomina de-
scripta: illis sublati, sacer agnus collo appen-
sus puerum furore liberavit. Quidam insimu-
latus furti, capitisque damnatus, cum pudore
simul,

COPIA

simul, & dolore anxius, incluso spiritu, pœnam morte tentat præcurrere, Dei matris, cui se commendarat, auxilio prohibetur a facinore, mox etiam innocentiae compertus absolvitur. Quidam, præcipiti fere senectute, ut requiem, aut finem reperiret dolorum, quibus acerrimis torquebatur, iam se secundum, vrendumque medicis permiserat, adit ad eum sacerdos noster, causa officij, persuadet professionem fidei, damnatorumque librorum inflammationē: ipse autem his rebus magis, quam curationi medicorū, valetudinem acceptam refert. Sequeretur nūc, ut de datis cōsilijs, sublatis odijs, restitutis rebus, explicato decantatoque Catechismo, aliquid diceretur; sed illa sollemnia. In pago finitimo trimestre spatium positum exequendis, non sine fructu, muneribus Societas. Sodalitas Parthenia iam pridem instituta, nouisque legibus hoc anno formata, diligenter præstítit officium suum: reperti ex his qui vota se obligarunt perpetuæ religionis. Optimates, ac Principes frequentes ad nos: plurimi eo tempore, cum historiam filij prodigi populo exhibuimus: & utile fuit multis se cognitos habuisse in aliena persona.

HALENSE COLLEGIVM.

QVO PAVCIORA de hoc Collegio scribantur, fecit casus repentinus. sacer-

N 4 dos

dos noster ex auditâ vnius confessione in nosocomio, contracto morbo, decedit : vulgatum id publice : scholæ clausæ : dilapsi discipuli: nostri partim occlusi domi, parti dimissi : sacerdotes tamen duo, quorum alter erat a sacris reginæ, alter a concionibus populo, segregati in propria scholarum domo, eximij fuere. Pentecoste gymnasium aperuit : & auctus numerus auditorum, reginæ in primis beneficio : hæc enim ad cœtum alumnorū, de quibus alias prescriptum, septem alios, eiusque exemplo Brixenensis Episcopus , decem , adiungendos curarunt . Anniuersaria studiorum instauratio nobilitata est argumento e beati Gregorij dialogo, de puer quinquenni e sinu parentis, ob irreuerentiam diuini nominis, auulso: profuit ea res spectatoribus, non tantum placuit . e Congregatione Reginæ Angelorum unus Romam prefectus inter Capuccinos adscribendus : alter se in aliud cœnobium contulit , causa religionis .

COLLEGIVM LVCERNENSE.

SACRIS exercitationibus Patris Ignatij , plures, & cœnobitæ præsertim, suo , & plurimorum bono instructi . duodecim amplius hominum millia apud nos sacrosancta mysteria obiere : confessiones generales ducentæ sexaginta circiter recensitæ : viginti quinque ab hæresi

hæresi absoluti: inter quos sacerdos vñus, idēque monachus, qui cum religione amiserat, & castitatem, ducta contubernali, quattuordecim annos in Lutheri cæno volutatus. quibus omnibus, quam attritæ vires veteris hostis, comprobabunt exempla, quæ subijciemus pauca de multis. feminæ aliquot lasciuiores vitæ ad honestatem reductæ: quidam peccatis gruuis, & annis, cum leuandæ conscientiæ multas regiones obisset, Lucernam tandem appulsus, Deo ducente, multarum molestiarum remediu peccatorum patefactione quæsiuit. Mulier ab exitio voluntario, & ab horrendis spectris, diuini agni beneficio in cerea effigie, liberata. non defuere qui emersi e gurgite falsarum opinionum præoptarunt exilium patriæ, ne in easdem relaberentur. quibusdam persuasum ieinium quadraginta dierum, quod arbitrabantur seruari non posse. opifex vñus in hæretico loco diu versatus, numquam adduci potuit, ut vetitis diebus carne vesceretur. hic quoque non canam eamdem cantilenam, rescissos contractus iniustos, aut æquis legibus téperatos, redditas pecunias, superstitiones ereptas, traditas flammis notas magicæ artis, pauperes in valetudinario, & carcere inuisos, auditosque. Præter virgines duas, quæ virginitatis voto se obstrinxere, quattuor aliæ nostris confiteri solitæ monasticam vitâ professæ. ex his vna maxime nobilis, & opulenta. Presbyteri, & vr-

bani,

bani, & pagani, partim confessionibus eorum
excipiendis, partim explicandis officijs vitæ
Christianæ, quod fit semel atque iterum singu-
lis hebdomadis, instruuntur diligenter ad mu-
neris sui functionem: curatum apud eosdem,
maxime apud paganos, ad quos crebro excur-
ritur, ut sacra supplex cultior mundiorque ha-
beatur. ita iam noua quædam est facies om-
nium templorum. res Scholaistica feliciter pro-
cedit. flos iuuenum egregius. ex his Capucci-
norum (quibus magna nobiscum familiaritas
intercedit) religionem amplexi tres: quattuor
ad alios ordines se applicarunt. enituit cuiusdā
singularis in castitate tuenda constantia, cum
impudicam mulierem ab se abegit acutissimo
clamore. sollemnis instauratio studiorum cele-
brata est eleganti dramate de dupli via, virtu-
tis, & voluptatis. maiore hebdomada extrema
ad Domini monumentum, eadem, aut maior
celebritas, & se cædentiū sodalium religio.
quæ alijs annis. die dominicæ cœnæ Nuntius
Apostolicus duodecim pauperum pedes, & la-
uit & osculatus est, populo admirabundo: eos-
dem deinde lauto excepit epulo, donauit argé-
to. Pransus idem apud nos, cum vtroque Præto-
re urbano, alijsque viris illustribus in ferijs
Pentecostes, interfuit declamationi publicæ
cum magna benevolentia significatione. &
fuerunt etiam in nos dona et publica, & priua-
ta. Templi ædificatio paulisper pependit, con-
cidente

cidente fornice altaris magni. et si hic casus vi-
detur propemodum fuisse optandus, ut elegan-
tia quædam, & decor adderentur, quæ deesse vi-
debantur, formæ prioris ædificationis.

MISSIO LAVEENSIS.

ZVINGA. Præfectura est Rauracorū, Ba-
sileæ finitima, quæ oppidum Lauffenum,
cum quinque pagis complectitur: sub ditione
quidem Episcopi Basileensis, sed Lutheranæ se-
ctæ, annos abhinc sexaginta ferme pertinaci-
ter adhæsit: Basileensibus submittentibus Mini-
stros verbi, qui rudes incolas turbulentis, & ve-
nenatis, declamationibus, inuito Episcopo, la-
etauerunt: donec anno superiore, compositione
cum Basileensibus facta, facta potestas ytriusli-
bet religionis amplectendæ. igitur Episcopus
gerens curam gregis, interposita auctoritate
Nuntij Apostolici, sacerdotem vnum e nostris
imperat iaciendis fundamentis. Missus est Se-
ptembri mense anni superioris, pater unus, in
concionandi munere aliquamdiu versatus: cu-
ius aduentus ita perculit ministri Lutherani a-
nimum, & vicinorum Basileensium, vt sollem-
nē precationem, votaque publica suscepisse di-
cantur, pro populo Lauffensi: sed Deus fauit rei
fusæ: Episcopus enim conuocato populo e sugge-
stu, breui oratione indicauit causam aduentus,
dein reliquit nostro concionandi locum. a con-
cione

cione idem Episcopus, quod numquam antea quisquam viderat, sacriss operatus est. pomeridianis horis Lutheranus Minister declamare voluit ad populum, verens scilicet ne allicerentur veritate doctrinæ: carpsit quædam e matutina nostri concione, nec tamen satis memoriter tenebat: quin etiam inferere se per domos, & circulos, ut obfirmarent animum in Lutheri dogmate, etiam atque etiam monens: sed facta celeriter occidunt: paulatim populus patris oratione, familiarique congressu eo adductus est, ut libenter audiret concionantem: quod, et Senatus fecit, multum licet Ministro reclamante. Interea pagos etiam noster obire concionabundus, & rusticano shomines imbuere Catholicis præceptis: nec vanus labor: accedente autoritate Præfecti Zuingensis, viri Catholici, qui additus erat præsidio nostro sacerdoti, omnes pagi se in Episcopi potestate dixerunt futuros. Tum vero Episcopi precibus, & rei perficiendæ expectatione permotus Pater Prouincialis, alterum sacerdotem subsidio misit: igitur coniunctis studijs utriusque effecerunt, ut exeunte Quadragesima trecenti accubuerint mensæ cælesti. Infremuit Minister, et ad illas machinas hæreticorum descendit, ad contumelias: quamobrem offenso populo, ipsoque Princeps, pro sua potestate expulit hominem Episcopum, alterumque ei suffecit non admodum a Catholicorum præceptionibns abhorrentem.

sic

sic vero admonet populum, vt ne magistratui publico repugnet, & consulit interdum nostros de capitibus vtriusque religionis. Verum ne singula delibemus, placuit tandem diuinæ bonitati, sub fine Autumni, vt voti participes essemus. sed ad omnium conuersionem, exitum quem datura fuit industria nostrorum, casus tu lit. Cœmeterium retinere cupiebant hæretici, Episcopi decreto prohibebantur, Minister vr gebat. tandem vbi vident rem confici non posse consultius existimarunt, qui adhuc persistebant in perfidia, vt sua coniungerent cum consilijs Catholicorum: ita communi voluntate, & assensione omnes sese Romanæ Ecclesiæ subiecerunt, veramque fidem tueri ostenderunt se vel effusione sanguinis paratos, & nullo vmquā tempore ab officio cessaturos. eodem die Lutherano Pædicanti cathedra, & Ecclesia interdixere: in sequenti die Dominico tanta confluxit ad rem diuinam concionemque virilis, & muliebris sexus multitudo, vt templo capi non posset. Nunc igitur, Dei beneficio, oppidum Lauffense cum tota Zuingensi ditione recepit integerrimam fidem, summamque laudem repositam putat in cura parendi.

FRIBVRGENSE COLLEGIVM.

CA TECHESIS dupli idiomate Gallico, & Germanico diuersis locis magno affluen-

affluentium cœtu, fructuque celebratur: ex omni numero, puer magnam laudem habet, quem parens, neque promissis allicere, neque minis, ac verberibus cogere potuit, vt iret ad urbem Tigurinam, vbi esse intelligebat cōciliabulum damni. Statæ conciones duobus in templis haberi solitæ ita probantur, vt multæ, et diuturnæ aliquorum preces tertiam extorserint. Sunt, & qui postulent quartam pro Gallis, quorum numerus in hac urbe non exiguus: sed nondum illis satisfactum ob iustas causas. Toto insuper aduentu Domini, vernoque iejunio, patres duo Iustrarunt pagos, Germanicum, & Gallicum, magno commodo incolarum utriusque. inter sex ac viginti, qui insipientium sectæ renuntiabant, fuit Prædicantis cuiusdam Heidelbergensis filius, qui Patris Canisij fama excitus, longo difficultique itinere ad nos contendit: interrogatus causam mutata voluntatis, inconstitiam dixit, & discordiam hæreticorum. is nunc memor a Deo accepti beneficij, Compostellam abijt peregre ad beati Iacobi, vt se voto exoluat. Nobilis matrona, bonorum, quæ inter hæreticos habebat, non leuem iacturam facere maluit, quam deducere in periculum, ad quam nuper redierat, Catholicam fidem. alij non pauci in recta sententia confirmati, & aduersus infidias aduersariorum instructi: superstitiones abolitæ. Duo, qui errore mentis, an desperatione, vitam sibi adimere cogitabant, iamque

vnus

vnum sibi cultrum adegerat in ventrem, alter se
præcipitauerat in vndas, salutaribus præceptis
instituti, & restituti pœnitentiæ: iniuste acquisi-
ta redditæ: fenebre malum compressum: lites di-
remptæ: et his similia. mulier, quæ viro relicto,
nomen vxoris cum fide perdiderat, nostrorum
consilio vfa, ad maritum supplex, iusta sceleris
æstimatione reuertit: histriones aliquot, & sal-
tatores, cum huc venissent Quadragesima, fo-
ra vrbis, & cōpita circumibant cum tympanis,
& tripudijs, instrumētis luxuriæ, renitente ma-
gistratu: quærebant vnum aliquem, quo pulsante
tympanum incitarentur ad saltum: cum re-
cusasset non nemo, causatus offendam Iesuita-
rum, inuentus est audaculus, cui tanti non fuit:
ad eius modulationem se in numerum mouen-
tes, ex sacris fecerunt profanos dies: sed non
diu lætati. tres ex eorum grege repentina obie-
runt. accersiti ægrotis auxilio fuimus, & sola-
tio. vir quidam genere & scientia nobilis, fe-
bre correptus, cum quemdam e nostris ad se vo-
catum disserentem audisset de rebus diuinis,
sic animo affectus est, vt solus cum solo sermo-
ne in miscuerit sæpius, consimili argumento: ei-
dem, cum per noctem, oblata esset nescio quæ
species vestis ad luxum exculta, agnouit pella-
ciam hostis: eum igitur vt conculcaret, decre-
uit in posterum vti vestitu, qui non esset inter
æquales excellens: suscipere peregrinationem
Lauretanam: cælibem vitam agere, vxore de-
functa:

functa: neque id promissum sanctius, quam praestitum fuit. Castellanus item magna inter suos auctoritate, paucis diebus ante extremum, piorum libellorum quos nostri suggesserant, crebra lectione, ita mutatus est, ut nihil aliud magis habuerit in votis, quam ex illorum praescripto vitam finire. Praeclara vero huius populi erga sacras Agni Dei imagines religio est, quibus donati, nihil sibi dæmonas, & cantatrices obesse posse, persuasum habent: quam illorum fidem Deus euidenti miraculo confirmauit. Vir senatorius aliquot sibi muneri datas huius modi plangunculas condiderat in arcam vestiarium: qua reclusa cum vxor aliquando vestes exponeret ad usum, flammula, ex ardenti cereo, decidit in floccos thecæ pulueris tormetarij: hic perterrita mulier, & impos mentis, ut fieri amat in subitis casibus, occlusa arca accurrit ad cereum, comprimendo igni: immagine dictu, theca lignea incendio absumpta, inclusa pulueri, & circumpositis vestibus pepercit: narravit hoc ipsa, & vir eius, augenda venerationi, multisque rem ipsam ostenderunt, ut affirmationi suæ facerent fidem. Proepiscopi magna in nos benevolentia: eius rogatu in anniversaria Synodo orationem habuit unus e nostris, pleno confessu. Friburgensis Parochus, Clerique Decanus, pijs commentationibus in Collegio exerciti: salutaria quædam consilia veteri religiosorum familiæ roganti data: ut mira-

mirabile sit labentem olim disciplinam in optimam viuendi formulā tam cito potuisse converti. Senatu utimur nostri amantissimo. accedit autem, ut controversia quadam non ita pri-
dem delata ad arbitrium paucorum, qui nobis non fauebant, causa caderemus: sed cum Senatorum nemo sustineret illam sentētiā ad nos perferre, nobis res integra permansit. cœpti Collegij ædificationem interrupere bellici tumultus: sed multorum ciuium insignis liberalitas erga nos eluxit: eis, ut aliquo modo grati essemus, ad pium usum sacramētorum, rectamque morum informationem, libellos aliquot promulgauimus: inter quos iucunda maxime, grataque fuit huic populo, duorum Heluetiorum, sanctorum doctorum & apostolorum vita litteris consignata: qua tantopere delectantur, ut auctori gratiam retulerint cum singulari munificentia. Scholasticorum frequen-
tia auxit magistrorum industriam: in repeti-
tione studiorum Comœdia data. Congrega-
tionis Marianæ sodales sunt ceteris exemplo.
ijs diebus, quibus laborat sæculum omnis la-
sciua licentia, ad sacrum montem pulcherri-
mo ordine incessere, decantaruntque litanias
numini placando. Altera item virorum insti-
tuta olim Sodalitas, hoc anno nobilitata mul-
torum accessu. Hos felices nostrorum cona-
tus non desunt qui introspiciant ægris oculis:
et fregerunt genuinum: sed qui fructus? suam

O inui-

inuidiam coarguerunt, non arguerunt nostram
infamiam.

RATISBONENSE COLLEGIVM.

Antē quām refero statū Collegij, pre-
tium fuerit attingere aliquid de vrbe ip-
sa. Ratisbona, Augusta olim Tiberia, vrbs est
per ampla, & antiqua, quondam Bauariæ ca-
put, nunc sponte, imperij legibus subiecta:
Danubio alluitur, in quem duo alij fluuij per-
æque nauigabiles, urbem iuxta, se exonerant:
pontem lapideum habet, & principem ædem
quadratam, labore, & opere, ante alias: qua
ad occidente tem, & septemtrionem vergit, vi-
neis vestitur amoenissimis: qua meridiem spe-
ctat, & orientem, porrigit se in perpetuam, &
æquatam planiciem agri, ita opimi, & fertilis,
vt cum obsitum videat Germania, non timeat
annonæ caritatem. fuit olim Christianæ pie-
tatis altrix, & popugnaculum veteris religio-
nis: nunc, et si degenerauit a priscis illis san-
ctisque maiorū institutis, Luthero addicta, ad-
huc tamen tam multis templis, cœnobij, Col-
legijs Ecclesiasticis, diuersisque religiosorum
familijs, conspicua est, vt ipsis reliquijs spem
faciat breui ad pristinum cultum nitoremque
redituram: id quod etiam laborat serenissi-
mus Bauariæ Dux Guelphus, introducto Col-
legio nostro: cuius rei narrationem a princ-

pro

pio auersam. Anno huius saeculi octogesimo sexto, mense Aprili, aliqui e nostris eo destinati, concionari in summo templo, aliaque munia Societatis exercere feliciter coepерunt: et primum serenissimus Princeps aedes attribuit, quas ubi nostris usibus minime accommodas intellexit, mutauit cum amplioribus, ea lege, ut tractu temporum, coemptis domibus, quae insulam efficiant, Collegium extruereatur: sed cum res lente procederet, casus inopinatus, ut perduceretur ad exitum, mirabiliter est consecutus: cum enim monasterium sancti Pauli a beato Volsango quondam huius urbis praefule fundatum, prope desolatum esset ob mortem Antistitiae feminæ nobilis, Dux, & Proepiscopus, iunctis opibus consilijsque vehementer contenderunt ut nobis traderetur, & tandem perruptis difficultatibus, quæ negotiū distinere videbatur, hoc anno, tertio Calendas Martias, notio Collegio initium sollemni ritu, & apparatu factum est: quam celebritatem, viri principes, & religiosissimi, omni ciuitate ad spectandum effusa, praesentia sua illustriore reddidere. igitur re diuina a Ratisbonensi Proepiscopo facta, & decreto Pontificio, quo abrogato monasterio, instituebatur Collegium. Ducique Bauariae commendabatur, publice recitato, Reuerendissimus Commissarius (nomē hoc est Ecclesiastica potestatis a Pontifice accepta) Sixti Quinti Pontificis maximi auctori-

O 2 tate,

tate, Patri Prouinciali nostro, prædictum Sancti Pauli monasterium, vna cum omnibus facultatibus, & redditibus annuis dedit. inter ceteram sacram supellectilem, est calix, & vestis, quibus, sexcentesimo abhinc anno, vtebatur beatus Volfangus, in sacro faciendo. Hac potestate accepta Pater Prouincialis orationem habuit, ut res locusque ferebat: subsecutus est concentus musicorum gratias Deo agentium, & faustæ amicorum gratulationes: viris denique primarijs epulum datum. Ergo, hoc tempore, qui de nostris Ratisbonæ morantur, in rem Catholicam diligenter incumbunt. incensferat rumor, haud dubium quin a malevolis, concionatorem nostrum pro suggestu edixisse, se, vertente anno, in Lutheranorum proseucha concionem habiturum: inuestigatus est a magistratu fons & caput maledicti, compertu est ab hereticis fluxisse: quod cum faciunt suam magis imperitiam illustrant, et nostram fidem. et iam aliquibus lux Catholicæ veritatis illuminxit. Hoc Iacobus Andreæ, Lutheranæ sectæ apud Zubingenses buccinator, cum persentis sceret, libellos famosos aduersum sacerdotem in vulgus dedit, ad quos totidem libris editis responsum est a nostro, ut clavis clavo pelleatur. Addita deinde est altera concio in templo nostro Sancti Pauli, tempore Aduentus. In formanda quoque iuuentute, ne hereticorum diligentia superaremur, instituta explicatio Chri-

Christianæ doctrinæ, in templo Sancti Cassiani, loco satis ampio, & commodo: neque multo post litterarum etiam ludus apertus: a quo Societatis munere, et si magistratus animo esset valde alieno, Dei tamen concessu, voti complices effecti sumus. Itaque Octobri mense, ut facere possemus principium docendi, Reuerendi Patres Scoti e familia Benedictinorum, omnem iuuentutem suam, quam multos annos sedulo erudierat, nostræ disciplinæ tradiderunt. præcessit oratio Latina habita a scholarum Præfeto. iuventus quattuor classibus distributa. Præter confessiones hebdomadarias, diuinis epulis apud nos pasti quindecim supra sexcentos: ex eorum numero totius vitæ rationem reddidere instar sexaginta. hæresim exuere octo: ab infami concubinatu se recepere non pauci. Tres ad monasticā vitam rediere, quam deseruerant. Afflictis hominibus, atque ægris, salutaribus consilijs auxilijsque frequenter prouisum. a magistratu cuiusdam oppidi euocati, vt adessemus cuidam capitis damnato, non vnius tantum, sed etiam, pro re nata, consulimus saluti multorum. Et poterant hæc, alia que distinctus scribi, non aceruatim componi: sed audientes quæso meminerint, ad singula Societas Domicilia edis- serenda festi-

O 3 PRO-